

عاشقه

البنيت المصلوبه على سهوات الحزن
والرغبه
والانتظار
مين يعرف قصتها الحقيقيه
وهي بتخفي دموعها ف شنطة يد
سودا وشيك
وبترسم وشها على أحدث ألوان الموضه
مين يعرف آخر صوره
انفجرت ف دماغها
وهي بتحذف آخر شرايينها
من شباك بيطل
على حلم اتأخر خالص.

البننت الحلوه
اللي ربما .. كان اسمها مي
أو نادية
أو حتى جيهان
لسه بتبحث في مواقف الأتوبيس
عن واحد يشبه صورته بقالها سنين
متعلقه ف برواز بني
جوه عنيتها.

مكن حد يقولها كلمه جميله
تكمّل بيها اليوم
أو واحد تاني
يفاجئها بنظرة غزل .. ببلاش
ويسيبها تروّح
على صوت غامض
مفهوم
لكن .. من غير عنوان.